

欽定剿平粵匪方略

欽定勦平粵匪方略卷三百三十八 癸亥年

三月十七日 癸亥 馮子材魁玉奏言鎮城迤南一

路直達丹陽其東路如陴城留村等處西南如  
句容以北之上塘塔山侯莊等處距鎮遠或四  
五十里近祇二三十里向爲逆蹤出沒之區自  
二月初柏林大創之後丹陽逆首葛天義密約  
句容死黨亟圖報復因官軍有備未敢深入三

月初四日僞侍王李逆暨僞懷王僞漳王等會  
由溧陽甯國率黨數萬圍集鎮城西南分踞上  
塘塔山廟一帶蔓延十餘里丹句兩巢同時蠢  
動游騎直逼甘棠橋地方當以賊衆剽悍其氣  
正銳利在速戰宜堅壁以老之一面選派將領  
就附近要隘輕騎游哨察看賊蹤時化子橋有  
逆隊數百意圖屯紮把總葉得彪等出其不意

鐵賊數名餘皆驚竄續又謀報常州逆首護賊  
糾同僞浦王等衆由東路陴城留村葛村一帶  
步步進逼分屯抄掠聲言俟後隊到齊會同待  
懷諸逆攻撲鎮江等語查侍護諸逆併力內犯  
我軍堵禦應分先後東路之賊距城五十餘里  
情形稍緩惟西路塔山上塘各屯近在肘腋不  
可不堵剿兼施挫其兇燄當派總兵張文德率

領馬隊由南門甘棠橋進發副將楊青山等各帶馬步分扼毛家甸馬鞍山左右偃旗設伏以翼其後總兵田宗揚等所部屯紮迴龍岡相機堵截仍嚴飭水陸各防暨新舊兩城一律扼守川備不虞初五日官軍行至駙馬莊見上塘各路之賊約五六千衆蠶擁而至參將田慶和等爭先馳突逆陣屹不少卻並有洋槍賊隊分排

兩翼兇鋒大張遊擊李兆霖等力殲賊目十餘  
名怒馬陷陣直搗中堅楊青山等舉旗起伏由  
馬鞍山前後夾擊賊衆披靡自相蹂踐殲斃約  
千餘名紛紛潰散回竄官莊上塘各屯臣等仍  
令各鎮將部勒士卒更番山哨賊由何路來犯  
卽以何營迎擊何營策應總以堅守爲主不以  
浪戰爲能水陸布置先自立不敗之地使之無

隙可乘無糧可掠使彼常勞而我常逸或者未能久持現在浙東大兵進攻杭嘉諸郡而常昭解圍之後官軍規復崑蘇南路軍情節節應手逆黨鋌而走險其勢如水趨壑鎮城首當其衝臣等督飭將士遠防近擊相機而動以期力持全局奏入

上命議政王軍機大臣傳諭曾國藩都興阿富明阿

馮子材魁玉曰待逆等糾股分偏鎮城馮子材等  
不以浪戰爲能而以堅守爲主以逸待勞所籌尙  
屬周妥卽著督飭將士嚴密防守伺其懈怠潛軍  
痛勦務當慎之又慎毋墮奸計第該逆不得逞於  
鎮城必將渡江而北都興阿等駐軍五臺山已及  
年餘該營將士久未接仗恐養成驕逸之性不可  
復用卽著都興阿富明阿隨時探明如有北渡逆



匪卽行相機截擊裏下河一帶並著會同吳棠設  
法嚴防毋任肆意紛竄至江皖軍情得手常州溧  
陽各匪首均離巢北竄恐其突犯雨花臺營盤著  
曾國藩轉飭曾國荃加意嚴防賊至卽剿以固大  
營儲該逆渡江上竄地廣兵單尤慮奔軼並著飭  
令毛有銘等妥爲防守勿令西竄廬郡以致重煩  
攻剿

十八日

甲子

上命議政王軍機大臣傳諭曾國藩左宗棠曾國荃  
曰本日將耆齡補授福州將軍左宗棠補授閩浙  
總督仍兼署浙江巡撫曾國荃補授浙江巡撫已  
諭令耆齡將所辦閩浙兩省防剿事宜及所部各  
軍移交左宗棠接辦矣左宗棠接辦後耆齡卽赴  
福州將軍之任左宗棠現駐浙省軍務正當緊要

其浦城防所應卽遴委大員前往接辦由左宗棠酌度奏明辦理閩浙兩省軍營兵勇均歸左宗棠節制耆齡所部廣勇並著左宗棠於閩浙軍營內選擇善於駕馭之員派令統帶如廣勇實係不能得力有害無利卽著左宗棠酌量撤遣浙省係左宗棠兼轄省分旣兼署巡撫尤責無旁貸曾國荃仍統前敵之軍駐紮雨花臺一意相機進取以圖

金陵毋庸以浙事爲念此時曾國藩巡江諒已旋至安慶仍著隨時與曾國荃熟籌戰守機宜東南軍務惟在該督撫等勦力同心通籌全局共圖挽救國家異數酬庸尤爲地方擇人起見該督撫等諒能益矢公忠以副委任也

上又命議政王軍機大臣傳諭耆齡曰本日榮將耆齡補授福州將軍左宗棠補授閩浙總督兼署浙

江巡撫耆齡接奉此旨著將所辦閩浙兩省防剿事宜及所部兵勇一一移交左宗棠接辦後卽迅速前赴福建省城接受將軍印務以重職守

十九日<sub>丑</sub>乙沈葆楨奏冒探聞皖浙巨逆議分三

路同時竄犯江西僞侍王李逆糾浙江餘黨並花旗等股由徽休進僞輔王楊逆糾古賴諸賊目由祁門進僞孝王胡逆僞堵王黃逆僞祐王

李逆由青陽進每路號稱十餘萬聞二月二十  
五日繼果營隨同浙江臬司劉典會剿徽屬之  
巖寺街賊匪陣斬數百人淹斃三千餘人二十  
九日賴南道王文瑞擊賊於漁亭擒殺千餘名  
景鎮爲休祁後應各營聲勢聯絡此兩路似可  
無虞惟青陽守兵頗單東流建德節節空虛殊  
爲可慮據段起報稱該逆從甯國繞出青陽前

鋒已至稠嶺去建德僅數十里臣以澎湖鄴浮  
均與建德接壤飛飭參將韓進春馳赴鄴建交  
界之石門街陳家街一帶扼要截擊並與祁門  
景鎮湖口各軍互相應援復飭副將孫昌國分  
撥礮船扼守鄴屬之陶家灘童子渡道員屈蟠  
駐紮樂平飛催道員王德榜馳赴浮梁防所續  
據署饒州府知府吳秉衡報稱該逆於三十日

竄擾建德殷家匯張家灘榨子橋等處徧地賊蹤旋准督臣曾國藩函知開甯國各逆有西竄之意已飭提臣鮑超回軍南陵青陽一帶截之臣計賊蹤飄忽鮑超回軍萬難繞出賊前然江省防兵能與前後夾擊該逆當不得逞奏入

上命議政王軍機大臣傳諭曾國藩左宗棠沈葆楨曰沈葆楨奏江省防軍隨同劉典剿賊於巖寺街



道員王文瑞擊賊漁亭均有斬獲休祁兩路可以  
無虞而青陽守兵頗單甯國之賊繞由此路竄至  
建德東流一帶殷家匯等處地方是江省信防稍  
鬆饒防更復喫緊沈葆楨飭令參將韓進春副將  
孫昌國水陸各軍前往鄱陽毗境扼截並催飭道  
員王德榜馳赴浮梁防所以爲堵禦所籌尙屬周  
妥並據奏稱接曾國藩函知甯國各逆西竄已飭

鮑超回軍南陵青陽一帶截剿惟此時賊蹤已至東流建德鮑超一軍勢難繞至賊前如果江省防兵布置得宜到處迎頭堵剿後路得有鮑超勁旅跟蹤緊躡當不難收前後夾擊之效著曾國藩卽飭該提督之軍乘機追剿並著沈葆楨嚴督饒防各路官軍探蹤迎擊與鮑超之軍隨時聯絡毋稍疏虞徽境之賊雖疊次堵剿而休甯尙未解圍尤

集賢堂奏議卷三十八 九  
恐賊因青陽一路不得逞志乘閒由徽休一路逞  
其圖犯江境詭謀並著左宗棠沈葆楨嚴飭徽屬  
及信防各軍加意嚴防毋稍鬆懈

二十日

丙寅

瑛奏冒據探另股髮捻由漢中西

擾襄沔攻陷沔縣又分股竄踞沔縣所屬之茶  
店鎮地方距略陽百里勢甚危急二月初三日  
該匪三萬餘人撲至盧又熊營盤該副將親督

接仗奈衆寡不敵未能得手正在相機分勦而  
漢中又復喫緊經毛震壽復飭盧又熊並副將  
徐邦道趕緊馳赴漢中以解危急毛震壽率領  
諸軍分駐城固以作犄角之勢初五日賊紮漢  
中城外三十里之桃花鋪初七日該逆竄至十  
八里鋪老君殿宗家營等處盧又熊商同徐邦  
道於初八日各帶所部分爲五路乘賊紮營未

定併力進搏斃賊數十名該匪潰逃追至萊子  
集地方次日該匪大股圍城占踞東關塔兒巷  
以爲巢穴我軍設法攻擊該逆抵死不出恐其  
在內暗挖地道經南鄭縣周蕃壽飭令警者輪  
流竄聽並於城濠以內開挖深濠惟城外多屬  
平原城池又大防不勝防盧又熊等督飭各營  
出隊皆獲小勝十三日兩軍復出會同鎮南健

威各營殺入塔兒巷砍開賊壘該逆死拒我軍  
奮勇爭先當將塔兒巷奪回共計焚殺賊匪數  
百名其城固自毛震壽駐紮以來匪衆每於夜  
間撲營均經我軍擊退該匪分十餘股四面圍  
攻自辰至酉更番遞戰易佩紳指揮川楚各營  
陳天柱率領陝甘官兵伺其銳氣少衰蠶擁而  
進賊卽轍亂旗靡大敗而遁斃匪無算逆首僞

天將倪李二逆一萬餘人擾至城固對河肆行  
焚掠僞齊王大股亦至南山意圖分攻沔縣經  
楊光澍統帶數營馳至上元關轟斃數十名該  
匪退走山梁原擬乘勢窮追適滇匪大股又渡  
渭水窺伺城固因收隊回顧城營現在東有藍  
逆北有張逆西有僞扶王僞遵王僞端王南有  
僞齊王蔓延二三百里羣盜如毛以僅有之官

兵幾難分布尙幸毛震壽以全力守城固盧又  
熊徐邦道以全力守郡城若能餉項無缺漢中  
大局當可固守待援川楚援軍屢經催飭迄未  
一應昨據歐陽正壩來稟以不敢遠離襄樊爲  
詞梁作楫周有全等來稟以未奉本省札飭亦  
不敢越境援陝是楚省援軍竟成畫餅臣聞郎  
中李雲麟帶兵勇往軍令嚴明現帶數營紮老



河口如蒙

皇上俯念漢南緊要飭令李雲麟帶兵迅解漢郡城  
圍三秦幸甚臣惟有策勵毛震壽等勦力同心  
就現有兵力相機防剿奏入

上命議政王軍機大臣傳諭官文略秉章嚴樹森瑛  
棨曰髮逆於攻陷沔縣後分股竄踞茶店鎮地方  
去略陽不過百里復有大股圍偏漢中徐邦道盧

又熊以全力扼守漢中而兵力較單賊勢太盛毛  
震壽駐守城固不克赴援雖經派勇援救恐不能  
立解城圍且張逆志在必得城固城固如有差失  
則漢郡更危前經諭令官文駱秉章等調撥得力  
兵勇越境助剿現在漢郡軍情日見緊迫而所謂  
楚蜀各軍無一至者設有疏失後患曷可勝言據  
瑛棨奏接梁作楫周有全等來稟以未奉本省札

飭不敢出境援陝等語著官文嚴樹森懍遵前旨  
速飭李雲麟會同梁作楫等督率所部馳赴漢中  
援剿毋得稍有遷延並著略秉章迅飭周達武督  
勇星馳赴陝會合漢郡諸軍盡力剿洗毋稍推諉

二十一日

丁卯

曾國藩奏言據提督李世忠咨稱

九洑洲浦口各營自被賊圍前敵糧路梗塞軍  
火缺乏與江浦不能互通消息危急萬分二月

初三初四兩日又增賊黨二萬餘人四面環攻  
猛撲不休該將弁等目不交睫竭力堵禦兩晝  
夜至初四日勢難再支遂將浦口以西及城南  
營寨一併撤回江浦城內查浦口一城本毀於  
賊我軍在西南兩門外分營駐紮此次被圍挫  
退實因半月來內無糧藥外無援軍以致不能  
固守至江浦存城將士自初五日以後亦經力

守旬餘屢與賊戰傷折不少乃賊衆繞城密圍  
水泄不通城中食盡糧運又絕子藥旣罄徒以  
輒石擊賊而賊攻益急行將就斃該鎮將因於  
十六夜率領弁勇冒死殺出江浦縣城維時橋  
林防營已被困二十餘日江浦陷後羣賊悉趨  
橋林該營守將邱昌良激勵士卒奮勇爭先以  
守爲戰十八日賊竟愈聚愈多不下六七萬衆

槍礮如雨我軍死守疊有傷亡賊又以礮轟坍  
城樓緣梯直上並有踰濠越牆進者各勇短刀  
相接衆寡不敵邱昌良身受重傷經左右背負  
出圍退至大勝關部卒十傷八九各該處失事  
人員委係力盡援絕可否均邀寬免惟世忠忝  
襄軍務不能先事籌防無可辭咎應乞奏叅請  
旨革職撤去勇號不准留營至豫勝營一軍或派副

將朱元興接統世忠罷職後決不敢任意妄爲  
致負

國恩等情查浦口江浦二城爲濱江絕大關鍵一  
經失此重險上可由和含巢各屬進逼廬州下  
可犯儀揚各防進窺裏下河套延數百里未易  
勦辦該提督李世忠悚惶引咎深明大義應如  
該提督所陳請

旨將李世忠卽行革職撤去勇號不准留營並懇

聖恩允其所舉卽派副將朱元興接統該軍以重防

務臣自上年十月卽有調度該軍之責未能先

事籌畫又不能設法救援咎亦難辭應請

旨將臣交部議處

曾國藩又奏言查近日軍情金陵駐守如常甯  
國自二月初屢捷後鮑超派何紹彩一軍守西



河王可陞一軍守灣沚洪客海一軍守清弋江  
其劉松山仍守甯國府城易開俊仍守涇縣朱  
品隆仍守青陽縣又換調吳廷華守南陵縣逐  
節布置糧道通暢甯郡應無他虞蕪湖金柱關  
兩防自前月大戰獲勝該逆至今不敢再逞臣  
於二十七日過大通聞黃汶金等大股由青陽  
上竄臣卽兼程西旋次日抵省調喻吉三護軍

二營赴池州李榕鈞字五營赴東流以截賊竄  
江西之路乃兵甫渡江賊已由建德關入彭澤  
鄱陽境內而譚星及古賴等股又蔓延於徽州  
各屬兩路皆有深入江西之勢幸浙江臬司劉  
典與唐義訓王沐等在休歙兩縣屢獲勝仗徽  
州一路必可擊退其建德一路竄入者恐貽江  
西腹地之憂臣正檄令鮑超由青陽赴援景德

鎮冀保江西完善之區旋據各營告警僞忠王大股上竄分枝牽掣廬江無爲州之兵而以全力猛撲石澗埠毛有銘劉連捷營盤自初三至初七日晝夜圍攻糧路斷絕文報不通臣不得已又飛檄鮑超改道渡江以解石澗埠之圍曾國荃亦自金陵分撥五營救援該處能否趕到尙難豫定又有股匪從河南竄入湖北之麻城

經鄂軍堵剿卽自三里埂竄至蘄水境內其勢  
亦將歸併皖境現在安慶廬州各屬處處喫緊  
竄入江西之賊別無大枝勁旅可以派往援剿  
幸撫臣沈葆楨已調水陸萬餘人分守景鎮樂  
平兩處或者足資扼堵江之南岸徽州與江西  
同警江之北岸下游與上游同警臣調度無方  
焦灼實深奏入

上命議政王軍機大臣傳諭曾國藩曰現在江浦等  
城隘被陷僞忠王復率衆猛撲石澗埠營盤江北  
軍情正當喫緊天六一帶防剿亦不可鬆勁若竟  
准李世忠所請革職不准留營則該提督轉得置  
身事外已明降諭旨將李世忠撤去幫辦仍留本  
任皖南大股逆賊由建德關入彭澤鄱陽鮑超改  
道渡江旣不克赴援景鎮卽曾國藩所謂之喻吉

三李榕各營亦落賊後江省素無大枝勁旅恐不足  
以禦茲狂寇江忠義一軍計日亦應東下著該  
大臣一面飛催前進一面酌量情形如果屆期巢  
含等處兵力足敷勦辦此軍卽可令其改道馳赴  
饒州一帶迎頭截擊如賊已竄腹地能否飭調該  
提督駐師江境相機進勦並飭喻吉三等拔營追  
躡俾與江省各軍共收夾擊之效均著該大臣迅

籌辦理江省爲浙皖諸軍後路關繫東南大局該大臣身膺重寄諒能妥籌援應與沈葆楨共相維持不致有誤事機

上諭內閣曰李世忠以提督大員辦理浦口等處防務不能竭力固守以致營盤被陷咎實難辭卽照其自請予以嚴譴亦所應得惟念該提督此次失守各營實因糧盡援絕衆寡不敵尙非有心貽誤

上年攻克六合等城頗著戰功該提督業因另案革職留任著加恩撤去幫辦軍務免其革職以示薄懲該提督疊經朝廷恩施逾格終始保全嗣後務當奮勇殺賊立功堅守滁州六合等處毋爲賊擾以贖前愆曾國藩節制江浙提鎮各員不能申明約束先事籌防致令江浦等城失陷實屬調度無方著交部議處仍著該大臣嚴督李世忠在營



各將弁明定賞罰迅圖恢復毋任稽延

曾國藩又奏冒僞輔王楊輔青糾約僞隨王跟  
王堵王祐王等會嘯聚西河灣沚紅楊樹黃麻  
渡麒麟山一帶不下十萬餘人以一大枝抄出  
高祖山之前潛匿村落中距我營七八里十數  
里不等以一小枝繞過高祖山之背橫出楊柳  
鋪揚言上犯涇縣火光燭天晝夜不滅鮑超飭

令宋國永布置高祖山營寨堅壁穩守另在板橋寒亭清弋江等營抽隊數成親自督率設伏於太子廟山坳以伺其變二月初一日烏沙鋪之賊進偪獅子山約三四萬衆旌旗蔽空迤邐而來將高祖山八營層層圍裹鮑超亟帶太子廟伏軍向山僻小徑偃旗疾趨行至離營二里許聞營中礮聲轟發知老營業已出隊接戰譚

勝達等督率各軍分路包賊宋國永乘勢從各  
營夾縫中擊出截賊數段賊隊譁亂不復成伍  
正思奪路竄走適雲慶等馬步齊至我軍縱  
橫盪決賊之前鋒鮮有脫者賊之後隊尙欲抵  
死來援鮑超揮令各將士奮力衝擊追近荻荅  
山梁美材大呼突出扼斷歸路羣賊駭懼紛紛  
竄入田隴衆軍合力蹙之追襲四十餘里遂平

高嶺周橋諸壘直抵西河賊乃依水爲險意圖  
抗拒俄而盧榮忠統帶礮划由清弋江駛下我  
軍水陸夾勦俘斬無算立毀堅巢敗賊始往桃  
花園灣汴一路而遁西河以北曰馬家園爲衆  
賊屯糧之所迤西則曰黃麻渡曰小淮窰爲王  
可陞進兵之地西河旣復王可陞知羣賊膽寒  
卽派蔣占鼐等進取小淮窰親督陽華坤等取

道黃麻渡潛襲馬園逆壘時已夜分王可陞令  
軍士傍壘縱火悉焚賊糧賊不知官軍之猝至  
睡夢中急起棄壘狂奔小淮窰之賊正欲聞警  
赴援蔣占鼇等已斫斷浮橋破卡而入乘勝逐  
之蹙偪入水者無數沿途卡壘盡毀無遺維時  
賊之由西河遁入灣沚者經盧榮忠截划隨同  
外江水師日夜轟擊賊不能堪乃縮入灣沚之

後山退聚竹塘旋分大股歸併梅嶺麒麟山意  
在伺閒再逞鮑超謂賊燄雖衰不速除之終貽  
後患次日引軍渡河進次紅楊樹偪壘而陣壘  
賊匿不出戰我軍相持數時羣以火器環擲延  
燒哨棚軍士冒烟突火踰濠直進一壘旣陷衆  
壘盡亂將弁揮隊縱擊殲獲甚多直追過桃花  
園竹塘灣汊後山賊皆聞風先遁遂焚其巢是

夜鮑超遺書劉松山令於明日自郡城率師來  
會將有事於梅嶺及麒麟山天甫向曙秣馬蓐  
食傳令宋國永等十五營專攻麒麟山婁雲慶  
等馬步八營專攻梅嶺而以劉松山所帶各旗  
營爲斷後行未十數里賊黨糾衆來迎宋國永  
同各營哨就山麓布列陣勢直前搏戰潛遣銳  
卒自山後舉旗先登襲破賊壘周麾而呼賊咸

驚疑卻顧宋國永等縱兵掩擊斃賊不計其數  
麒麟山堅壘悉平是日劉松山亦破廟埠之壘  
殲賊千餘婁雲慶鄧榮貴等擊破梅嶺之壘並  
收復仰賢圩各處餘匪分道竄逸一由新河莊  
敗往東壩一由油榨溝敗往廣德建平臣查西  
河小淮窰爲水路衝要自被賊踞數月糧運梗  
阻大爲甯國各營之患幸將士同心五日之間



卷之三十一  
三  
悉復諸隘距郡城數十里內一律肅清在事人員厥功甚偉可否彙入楊柳鋪涇縣各案酌給獎敘之處出自

鴻施逾格至力戰陣亡之參將李芳菲等二十六員  
開單清

旨飭部從優議卹以慰忠魂奏入

上諭內閣曰官軍連克甯國近城各要隘西河灣沱

紅楊樹黃麻渡麒麟山一帶賊壘悉平敗賊分路竄逸仍著鮑超等乘勝追擊將敗竄之匪盡數殲除所有此次在事出力人員准其彙案請獎陣亡之參將李芳菲等二十六員均著各照本職本銜從優議卹

同日都興阿富明阿奏言據水師總兵吳全美咨稱逆匪大股北趨意在分竄儀揚及和含安

徽等處南岸七里洲中關一帶當必有隙可乘  
卽親督遊擊陳步雲等駛赴浦防會同梁正源  
等相度情形攻其不備三月十八日瞭見七里  
洲下賊旗徧野黃旗賊目督隊山竄當卽飭令  
梁正源等分開大小師船直徧南岸對賊開礮  
連次轟擊斃賊數十名餘皆遁回賊營我軍徧  
近賊巢施放噴筒火箭逾時賊營火起逆衆蒼

黃奔竄我軍乘勝登岸撓抄斬馘無算卽將七里洲尾賊壘三座一律踏毀其通江關地段爲儀六門戶且係浦防水師要道連日據探北岸賊氛蠢動該處戒嚴卽派長龍礮划馳往堵剿會合該防營互爲聯絡並飭梁正源等迅卽趕回觀音門督領各船出賊不意駛往燕子磯開礮攻擊轟斃賊匪七十餘人賊目十名我軍乘

勝追勦鼓勇而進當將該逆頭卡全行踏毀連  
日另股賊匪千餘人竄至炭渚一帶往來騷擾  
猖獗異常吳全美等當派副將馬步雲督率師  
船傍岸迎擊賊見我軍有備旋向高資逃逸經  
該處防兵登岸兜勦適馬步雲由炭渚追擊左  
右包抄斃賊百餘名賊卽遁向山後而去次日  
賊復聚衆來撲一由丹陽撲至炭渚一由廣角

山撲至高資散漫鄉閒任意蹂躪經馬步雲等  
分隊兩路迎勦殺斃數十名賊匪見我軍勢狂  
紛紛敗竄旋接下游水師統領林宜華等稟稱  
初三日李起高親率所部各船駛赴南岸巡視  
各灣行至江心見圩塘魏村一帶上下數十里  
火光燭天知是逆匪撲犯江濱亟令各船飛駛  
前往勦洗及至圩塘港口逆匪黃旗徧插蟻聚

蘆洲卽飭開礮轟擊該逆意圖奔竄適林宜華  
飛調礮划迎勦會同環攻擊斃賊目數名逆匪  
百餘賊勢不支陸續卻退該逆又由陴城出撲  
包港分我兵力經在防師船開礮環轟賊又糾  
集大股自小河赴援包港等處經各幫師船分  
投迎勦該逆受創遁回次日逆匪駛船數百隻  
泊張公橋奔牛鎮等處經林宜華擊斃無數生

擒六十餘名訊據賊供云此股賊衆係僞護王  
僞侍王等由蘇常杭嘉等處訓賊衆數萬逆船  
數百餘隻分泊南岸上至包港小河下至江陰  
石牌處處牽掣時思北竄等語連日該逆或出  
或沒勢甚臨張雖屢次擊退仍敢盤踞 臣等立  
飭添派師船接應又飭總兵層啟綸酌派三汊  
河礮划數隻遊擊葉廣全撥船十餘隻馳往協



剿此次該逆集數萬之衆逆船數百隻分援包  
港小河魏村圩塘一帶希圖北渡雖經水師屢  
次痛剿而逆情詭譎難保不復覬覦若下游賊  
情喫緊臣富明阿卽遵

旨由陸路馳赴靖泰一帶分派布置擇要嚴防至北  
渡難民屢經臣等飭令在防官兵及靖泰各縣  
實力拊循認真盤詰惟因江北無謀生之處田

地房產皆在江南賊來暫避江北賊去則仍歸南岸臣等諄飭各路在防官兵及地方官嚴密盤詰毋令奸宄溷跡以致別生事端又聞江浦之賊議俟擄足糧食卽分股窺犯儀揚牽掣我軍餘逆悉由和州等處合竄蔣壩從裏下河後路包抄計圖大逞臣等查該逆垂涎裏下河蓄謀已久旣欲竄撲下游又欲北竄蔣壩乘隙圖

遲惟有悉心籌畫晝夜嚴防斷不敢稍涉大意  
奏入

上命議政王軍機大臣傳諭都興阿富明阿吳棠喬  
松年曰揚防水師於上游之七里洲等處下游之  
圩塘各港口疊獲勝仗而上自包港下至江陰石  
牌處處均有賊蹤時思北竄亟應嚴密防範著都  
興阿等督飭上下游水師統領實力梭巡相機剿

截如下游情形喫緊卽著富明阿馳赴靖泰一帶  
分派布置擇要嚴防毋得稍涉鬆勁至江浦之賊  
議欲備足糧食卽分股窺伺儀揚牽掣我軍餘逆  
悉由和州等處合竄蔣壩從裏下河後路包抄是  
逆情詭譎將圖大逞卽著吳棠嚴飭在防將士實  
力扼守不得稍涉大意都興阿等仍隨時會籌防  
剿保全完善要區是爲至要北渡難民露宿江灘

顛沛流離情殊可憫第人數過衆恐易聚而生事  
仍著都興阿吳棠等飭屬妥爲辦理應拊循者加  
意拊循應盤詰者嚴加盤詰務令難民不致失所  
而奸宄不能溷跡方爲妥善

上諭內閣曰吳棠著補授漕運總督所有江北文武  
各員及軍務地方一切事宜均著仍歸吳棠節制

二十四日  
庚午馮子材魁玉奏言僞侍王等賊屢

敗後惟於跼岡侯莊各處依村築壘分匿民房  
未敢遠離巢穴附近窮簷慘遭蹂躪亟應設法  
驅除以免失所查該處山巒叢雜搜剿爲難惟  
有密派馬步於近城十餘里內分投設伏一面  
閉關堅壁靜以待之賊見官軍不出勢必離巢  
掠食待其偪近然後夾擊分抄出奇制勝彼進  
無所掠退無可食斷難日久相持因飭總兵張

文德等分統馬步各隊授以機宜屯伏九華山  
左右截勦三月十一日貼岡官莊等處大股悍  
賊山巢由西而東前鋒直達塗山楊巷其氛甚  
惡我軍由迴龍岡進遏該逆歸路張文德所部  
直趨甘棠橋攔頭堵擊步軍分紮九華山麓參  
將田慶和等各率精騎橫衝直擊斃賊頗衆時  
塗山一帶逆旗團簇刀矛火器往來抗拒兇燄

大張正鑒戰閒楊青山從迴龍岡揮軍下壓將賊隊橫分兩截都司吳天興等發馬陷陣賊悍逆數十名其勢少卻參將楊安龍等大呼殺賊力搏中堅該逆披靡由東南一路奔竄楊青山跟蹤掩殺遙見馬陵以東逆股纔擁來援當卽分撥勁旅扼堵丹陽之賊一面會同張文德等隊前後包抄黃武賢手刃悍賊大兵四而蹙



之餘黨奔潰遁回侯莊各巢共斃賊四五百名  
東路陴城諸賊望風洶懼棄巢而遁回竄孟河  
旋又諜知西路上塘侯莊等處踞逆亦冒雨遠  
颺當派鎮將躡剿我軍由跔岡侯莊一路分投  
追擊斃賊無算直抵南青山地方斬馘五十餘  
級逆黨不敢迎拒大半歸併白兔老巢餘匪竄  
入句容境內當將沿村逆壘一律踏毀東西附

近均無賊蹤惟逆情詭譎難保不乘閒思逞江  
防重地尤應加意籌維仍督飭水陸各營隨時  
堵剿奏入

上諭曰仍著督飭將弁認真堵剿毋得恃勝致有疏  
虞

二十八日  
戊戌 著齡奏言撫臣左宗棠進紮嚴州

藩司蔣益澧道員魏喻義各軍會攻富陽縣城

甯郡中外各軍防守西興以杜杭州逆匪偷渡  
其前竄徽州之賊探聞屢犯屯溪地方均爲徽  
防各軍擊退尙踞許村一帶績溪縣股匪亦盤  
踞未退江皖官軍及撫臣左宗棠調派赴徽各  
營分布防守遏賊西竄之路臣仍當隨時確探  
設或江西有警卽調援師於江閩交界地方相  
機堵剿爲禦賊門外之計一俟徽郡賊衆擊走

皖防穩固再行拔隊東下以冀遠應浙師近防  
閩境仍當嚴飭將領約束兵勇免滋事端惟閩  
省本屬瘠區用兵日久經費支絀士卒常有乏  
食之虞現將處防各營量加裁減以節餉需奏  
入

上命議政王軍機大臣傳諭左宗棠曰耆齡援浙各  
軍前諭統歸左宗棠調度現在分紮東陽等處尙

足爲後路聲援惟據該將軍奏稱經費支絀量爲裁減左宗棠所統兵勇是否足敷布置僞閩軍尙可裁減自應酌量裁汰以節餉需著該督妥籌辦理以副委任

二十九日 乙亥 李鴻章奏冒自福山攻克常昭解

圍後太倉守賊僞會王蔡元濬屢次遞稟乞降情辭懇摯臣未忍絕其自新之路因剴切札諭

並派員入城開導勸令及早獻城該逆首請卽  
於三月初九日派隊分紮四門豫備接應程學  
啟等如期嚴陣以待是日東門忽出賊匪數千  
頭紮白巾聲稱排隊迎接南門又出賊萬餘各  
路伏賊齊起我軍分投迎勦衆寡不敵致被衝  
動李鶴章所部各營已偪東南城根且戰且退  
李鶴章屢受槍子傷幸不甚重程學啟所部進

扼西門當崑山來路又有賊數千由崑山來並  
有賊船八十餘號程學啟派弁迎探見該逆語  
冒親密恐有詭計當飭各軍準備出戰忽大股  
賊由南門抄出又由西門突出悍賊數千擁擁  
來撲前後圍繞程學啟揮令各將士併力攻勦  
戰數十合斃賊千餘仍將該逆擊退該逆竄撲  
婁塘前敵營盤副將梁安邦等擊走之其時戈

登李恆嵩已帶常勝軍由松江圖攻崑山臣聞  
信卽調該兵官徑赴太倉合力進攻復派編修  
劉秉璋馳往幫同李鶴章料理出隊程學啟與  
戈登等面商妥協卽於次日督派三營進紮太  
倉西門並調副將陽利見帶淮揚水師中營同  
紮西門大河戈登李恆嵩帶隊由南門進毀賊  
卡三座十四日逆首際天福李汶熙帶礮船三



十餘號堵截河口程學啟派洋槍隊四百餘名繞襲該逆後路自督水陸各營兩面轟擊奪獲礮船多隻該逆窮蹙乞降當將賊首際天福並僞燕豫等十九名悍逆百餘名悉數誅戮城賊出援又經擊退賊膽已寒戈登復帶礮位至程學啟營前安設先將西門賊築石壘二座全行轟破程學啟派隊守之李鶴章派隊進紮南門

防賊竄逸戈登排列大礮在西門外連環轟擊  
城垣斃賊甚多該逆仍死拒不退我軍添礮四  
面開放自巳至申擊倒城頭悍賊不計其數轟  
裂城垣十餘丈各營奮勇搶越城濠一擁而上  
刀砍槍擊賊衆披靡該逆欲由南門出竄又被  
我軍擊回程學啟戈登李恆嵩等登時進城捕  
殺各軍因賊詭降屢次拒傷官兵立將城賊萬

餘人圍而殺之僞會王率二千人突圍由北門  
逃出程學啟等派隊緊追立擒蔡元濠誅之餘  
匪追斬殆盡遂於三月十五日克復太倉州城  
現飭李鶴章帶隊入城布置防守程學啟仍會  
同戈登乘勝進攻崑山以聯常昭之氣此次在  
事出力人員並傷亡弁勇容臣查明彙請獎卹  
奏入

上命議政王軍機大臣傳諭李鴻章曰逆首蔡元濤  
踞守太倉敢以乞降詭計誤我軍情實屬罪大惡  
極經程學啟將該逆生擒誅之並將城內餘匪悉  
數圍殺自應如此辦理以儆凶頑現在太倉旣復  
則崑山賊膽必寒乘此破竹之勢不難剋期攻復  
著李鴻章督飭程學啟會同戈登指日攻克進規  
蘇城以牽忠逆北竄之勢常昭雖甫經解圍而現

與滬上各軍聲勢聯絡可保無虞若略國忠等能  
出奇伺隙亦足以擾賊謀並著該撫密籌辦理以  
收多方誤賊之效

上諭內閣曰官軍攻克太倉州城生擒逆首蔡元濬  
盡法處死殺賊淨盡勦辦甚屬得手著李鴻章督  
飭各軍乘勝進攻崑山迅圖克復所有出力及傷  
亡各員弁勇丁並著查明彙案奏請獎卹